

Meeqqat tapersorneqarnissaannut Inatsisartut inatsisaat nr. 20, 26. juni 2017-imeersoq

Kapitali 1

Aalajangersakkat aallarniutaasut

§ 1. Inatsisartut inatsisaat meeqqanut inuusuttunullu illersuinermit ikiorsiinernullu atorneqassaaq, meeqqat inuuniarnermikkut atugarliortut imaluunniit immikkut pisariaqartitsisut immikkut siunnerfigalugit. Inatsisartut inatsisaat manna naapertorlugu ikiorsiinerup siunertaraa meeqqat pisinnaatitaaffiisa qulakkeernissaat, kiisalu meeqqat inuuniarnermikkut atugarliortut imaluunniit immikkut pisariaqartitsisut ukioqatitik assigalugit inuttut ineriartornissaminnut, ingerlalluarnissaminnut, peqqissuunissaminnut aammalu inersimasutut inuunerminni nammineersinnaasutut periarfissaqarnissaat anguniarlugu.

§ 2. Inatsisartut inatsisaat una malillugu aalajangiinerit meeqqamut ajunnginnerpaasussaq aallaavigalugu aalajangiinerusassapput.

Imm. 2. Meeqqamut tunngasuni pissutsini tamani meeqqap nammineq isumai pingaartinneqassapput aamma meeqqap ukiuinut perorsimassusianullu pissusissamisootumik eqqarsaatiginnittoqassalluni.

§ 3. Kommunalbestyrelse iliuseqarnermigut paasiniaanermigullu pisariaqassappallu Inatsisartut Inatsisaat una naapertorlugu ikiorsiinissamut neqerooruteqarnermi meeqqap kialuunniit alliarturneranut uku aallaavigalugit peqataassaaq:

- 1) atugarissaarnissaanut, peqqissuunissaanut ineriartornissaanullu,
- 2) toqqissisimanartumi isumassuinnikkut avatangiiseqarnissaanut,
- 3) inersimasunut, ilaqtutanut inuttullu attaveqartarfiinut toqqissisimanartumik aalajaatsumillu attavissaqartuarnissaanut,
- 4) inersimasutut nammineersinnaassuseqarluni inuunerup angujartornissaata ilinniarnerni inuttullu ineriartornerani tatiginartunik sinaakkuteqarnissaanut.

Imm. 2. Meeqqap inuunerani pissutsit ataatsimut isigineqassapput sapinngisamillu siusissukkut tapersorneqassalluni.

Imm. 3. Kommunalbestyrelse meeqqanut inuusuttunullu ataqatigiisumik ilusilersukkamik kiisalu meeqqanik sumiginnaanermik pinaveersaartitsinermit piareersimasortalimmik siusissukkut paasisaqartarnissamut meeqqallu sumiginnakkat pillugit sulianik suliarinnittarnermut upalungaarsimasussanik, kiisalu ajornartornermi upalungaarsimanissamik periusissiuassalluni meeqqamik angerlarsimaffiup avataanut inissiinissap tungaanut isumaginninnikkut nakkutilliinermik suliaqarnissamut pilersarusiussaaq, takuuk § 36 imm. 3 naammassisinnaajumallugu politikkiliussaaq. Taannalu kommunip nittartagaani tamanut saqqummiunneqassaaq siviunerpaamillu ukiut sisamat allortarlugit iluarsaateqqinneqartassalluni.

Imm. 4. Kommunalbestyrelsip meeqqanut attaveqartartussat sulisut pisortallu tamaasa atorfininnginnerini meeqqanut pinerliisimannginnerannut pinerluuteqarsimannginnerannullu uppernarsaatit pissarsiarisassavai, kiisalu sulisut suliassaannut tunngatillugu uppernarsaatit

nalilersorluartassallugit. Kommunalbestyrelsi immikkut pissutissaqartillugu pinerluuteqarsimannginnermut uppersaammik aamma meeqqanik pinerliisimannginnermut uppersaammik nutaamik pissarsiniarsinnaavoq.

§ 4. Inatsisartut inatsisaat meeqqanut 18-it inorlugit ukiulinnut Kalaallit Nunaani najugaqartunut atuuppoq, kiisalu meeqqanut 18-it inorlugit ukiulinnut utaqqiisaasumik Kalaallit Nunaanniikkallartunut, tassungalu ilaapput meeqqat timimikkut tarnimikkulluunniit innarluutillit, inunnut innarluutilinnut ikiorsiisarneq pillugu inatsit malillugu ikiorneqartartunut.

Imm. 2. §§-ini 2, 27, 28, 31, 32, 41, 42, 43mi 46-milu malittarisassat kiisalu najoqqutassat § 43, imm. 3 aamma § 42 imm. 7 malillugu atulersinneqartut taamatuttaaq meeqqanut pisortat ikiorsiinerat tungavigalugu Kalaallit Nunaata avataanut inissinneqartunut atuupput.

Imm. 3. Inatsisartut inatsisaat inuusuttunut 18-iniit 23-nik ukioqalernerq ilanngullugu § 42 naapertorlugu suliniuteqareernermi malitseqartitsineq aamma atuutsinneqassaaq.

Imm. 4. Aammattaaq Inatsisartut inatsisaat angajoqqaanngortussanut, inuuniarnerminni pissutsit pissutigalugit ikiorserneqarnissamik pisariaqartitsisunut atuuppoq, tak. § 26.

Kapitali 2

Kommunalbestyrelsip pisinnaatitaaffii

Aaliangiisinnaanermut pisinnaatitaaffik

§ 5. Kommunalbestyrelsip aalajangiiffigisinnaavai:

- 1) meeqqanik ikiorsiineq
- 2) inuusuttunut suliniuteqareernermi malitseqartitsinissaq
- 3) meeqqat ikiorserneqarnerannik unitsitsineq aamma
- 4) inuusuttunut suliniuteqareernermi malitseqartitsinermik unitsitsineq.

§ 6. Nukiginnartumik meeqqamik inissiinamik aalajangiinissaq, meeqqat pinartumik pisariaqartitsinera pissutigalugu kommunalbestyrelsemit suliarineqarnissaa utaqqinneqarsinnaangippat, aalajangiingallarnek kommunimi meeqqanik sulianik ingerlatsinermut oqartussaasoqarfimmi pisinnaavoq.

Imm. 2. Imm. 1 malillugu ikiorsiineramik aalajangiigaq unereersimassagaluarpalluunniit kommunalbestyrelsip ataatsimiinnerani tullermi ilisimatitsissutigineqassaaq.

Naammassinnineq

§ 7. Kommunalbestyrelsip aalajangikkami naammassineqarnissaat akisussaaffigaa.

Imm. 2. § 28 malillugu kommunalbestyrelsi aalajangiinerit naammassinissaat siunertaralugu, pisariaqartinneqartumik kinaassutsimut uppersaammik takutitsinermigut eqqartuussivimmillu aalajangiivigineqaaqqaanngitsumik, meeraq ujarniarlugu nassarniarlugulu meeqqap angerlarsimaffianut isersinnaatitaavoq.

Imm. 3. Angerlarsimaffimmut iserneq § 45 malillugu isumaginninnikkut sulinermi misissuinermit aammalu meeqqap qanoq ingerlaneranut atatillugu pippat, peqqissusianut imaluunniit ineriartorneranut

aarlerinartoqarneranik aalajangiinissamut pisariaqartuusutut isumaqarfigineqarpat, kinaassutsimik uppernarsaammik pisariaqartinneqartumik takutitsinikkut aamma eqqartuussivimmiit aalajangiivigineqaqqaanngitsumik meeqqap najugaanut kommunalbestyrelse isersinnaatitaavoq.

Kapitali 3

Nakkutilliineq

§ 8. Kommunalbestyrelse meeqqat inuunerminni atugarisaannik nakkutilliissaaq. Nakkutilliineq ornigunnikkut paasiniaanikkullu ingerlanneqartassaaq, taamaalilluni kommunemi meeqqamik ikiorserneqarnissamik pisariaqartitsisumik sapinngisamik siusissuklut kommunalbestyrelse ilisimaarinnilerniassammat.

Imm. 2. Kommunalbestyrelsip meeqqamut pineqartumut angerlarsimaffiup avataanut inissinneqarsimasumut nakkutilliineq ingerlattassavaa.

Imm. 3. Kommunalbestyrelsip kommunimi ilaqutariit paarsisartut nakkutigisassarai. Kommunalbestyrelsip ilaqutariinni paarsisartuni pisariaqartinneqarpat annertusisamik nakkutiginninnissaq aalajangissaavaa.

Imm. 4. Nakkutilliineq imm. 2 aamma 3 tunngavigalugit nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

Imm. 5. Naalackersuisunit qinnuigineqarneq tunngavigalugu, imm. 1-imiit 4 malillugu nakkutilliinermik kommunalbestyrelsip ingerlatsineranut paasissutissat kissaatigineqartut tamarmik nassiunneqarnissaat, kommunalbestyrelsip pisussaaffigaa.

Imm. 6. Naalackersuisut nakkutilliinermut malittarisassanik aalajangersaasinnaapput, taassuma ataani kommunalbestyrelsip nakkutilliisussaataaernerup suliaqarneranut, nakkutilliinerup aaqqissuunnissaanut, nakkutilliisussaataaernerup naammassinissaanut atugassarititaasunik piunasaqaatinillu, sukannererusumik nakkutilliinissami piunasaqaatinut aammalu kommunalbestyrelsip nakkutilliinermut nalunaarusiaanut piunasaqaatinut.

§ 9. Naalackersuisut Inatsisartut Inatsisaanni uani malittarisassanik kommunalbestyrelsip atuinera ingerlatsineralu pingaarnertut nakkutigissavaat.

Imm. 2. Naalackersuisut meeqqanut inuusuttunullu ulloq unnuarlu paaqqinniffinnik ingerlatsineq, aningaasartuuteqarneq perorsaanermillu nakkutilliineq ingerlatarissavaat.

Imm. 3. Nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

Imm. 4. Naalackersuisut qitiusumik nakkutilliinermik ingerlatsiveqassapput (nakkutilliinermik ingerlatsivik), imm. 1 aamma 2-lu naapertorlugit nakkutilliinermik ingerlatsisartunik.

§ 10. Nakkutilliinermik ingerlatsivik, tak. § 9, pisariaqartinneqartumik kinaassutsimut uppernarsaammik takutitsinermikkut eqqartuussivimilluunniit aalajangiivigineqaqqaanngitsumik, paasissutissat kommunip ingerlatsiviata pigisai tamaasa nakkutilliinerminnilu atorsinnaasorisatik takusinnaavaat, tamatumunnga aamma ilaapput inuit pillugit paasissutissat paasissutissalluunniit inunnut tunngasut mianerilluinnartariaqartut kiisalu suliffiup iluani allattugaatigineqartut.

Imm. 2. Nakkutilliinermik ingerlatsiviup nakkutilliineq pillugu allaganngorlugu kommunalbestyrelsimut nalunaarusiaminni najoqqutarineqarsinnaasunik piunasaqaateqarsinnaapput.

Nakkutilliinermik ingerlatsiviup aammattaq nakkutilliineq tunngavigalugu kommunalbestyrelse pisussaaffiliisumik makkuninnga peqqussuteqarsinnaapput:

- 1) Inatsisartut inatsisaat una aallaavigalugu kommunalbestyrelse suliame ingerlanneqartumi ataatsimi arlalinniluunniit § 45 naapertorlugu isumaginninnermi sullissinermik misissuineq aallartissavaa imaluunniit § 46 naapertorlugu iliussissanut pilersaarusiussaaq, taakkulu suliamek suliaqarnermi aallartitsinerit piffissap nakkutilliinermik ingerlatsiviup aalajangingaata iluani naammassineqarsimassapput. Suliap imaluunniit suliat qanoq ingerlanerat pillugu nakkutilliinermik ingerlatsiviup ataavartumik kommunalbestyrelse paasissutissiisarnissaa piunasaqaatigisinnaavaat.
- 2) Nakkutilliinermik ingerlatsiviup nakkutilliinerminnut atatillugu naliliippata, suliame pineqartuni kommunip ingerlatsivia Inatsisartut Inatsisaanni matumani aalajangersakkanik malinnissimangitsoq, Inatsisartut Inatsisaat manna naapertorlugu suliamek naammassineqarsimasumik ataatsimik imaluunniit arlalinnik kommunalbestyrelse suliamek kingumut qaqitseqqissaaq, imaluunniit
- 3) nakkutilliinermik ingerlatsiviup piffissaliunneqartup iluani kommunalbestyrelsip § 45 naapertorlugu isumaginninnermi sullissinermik misissuineq aallartissavaa, nakkutilliinermik ingerlatsivimmiit naliliippata suliame ingerlasumi imaluunniit naammassineqarsimasumi sukannernerusumik ikiuisoqartariaqartoq, tamannali aallartinneqarsimanani. Isumaginninnermi sullissinermik misissuinerup siunertaraa inatsit manna malillugu meeqqap maannakkut ikiorserneqarnissamik pisariaqartitsineranik paasisaqarnissaaq, kiisalu sukannernerusunik ikiuinernik aallartitsisoqassanersoq.

§ 11. Nakkutilliinermik ingerlatsiviup, ulloq unnuarlu paaqqinniffiup paasissutissaatai nakkutilliinermut ingerlatsiviup nakkutilliinerannut pisariaqartinneqartut tunniunneqarnissaat pisinnaatitaaffigaat.

Imm. 2. Nakkutilliinermik ingerlatsivik ulloq unnuarlu paaqqinniffimmut peqqussummik aalajangiisinnaapput, tamatumalu eqquutsinneqarnera apeqqutaalersinnaavoq § 34 naapertorlugu ulloq unnuarlu paaqqinniffiup akuerineqarnerata ingerlaannarnissaanut. Peqqussutip eqquutsinnissaanut nakkutilliinermik ingerlatsivik piffissamik killiliisinnaavoq.

Imm. 3. Pissutsit takutippassuk ulloq unnuarlu paaqqinniffimmi sukannernerusumik nakkutilliinissaq pisariaqartoq, nakkutilliinermut ingerlatsivik tamanna pillugu aalajangersinnaavoq. Sukannersumik nakkutilliinissamat aalajangernerumut atatillugu nakkutilliinermik ingerlatsivik peqqussuteqassaaq, tak. imm. 2.

Imm. 4. Nakkutilliinermik ingerlatsivik ulloq unnuarlu angerlarsimaffimmi pissutsinik ernumanaateqarsinnaasunik malugisaqaruni, kommuninut meeqqap ulloq unnuarlu angerlassimaffianut akisussaasunut, pisariaqartitsineq naapertorlugu nalunaaruteqassaaq.

Imm. 5. Naalackersuisut ersarinnerusunik malittarisassiussapput aaqqissuusaanermut nakkutilliinerullu imarisassaanik, kiisalu qaqugukkut annertusisamik nakkutilliisoqassanersoq qaqugukkullu piunasaqaateqartoqassanersoq.

Kapitali 4

Isumaginninnikkut Aqutsisoqarfik

§ 12. Naalackersuisut isumaginninnikkut aqutsiqarfeqassapput (Isumaginninnikkut Aqutsisoqarfik),

tassanngaanniillu kommunini ingerlatsiviit aqutsisoqarfiillu Inatsisartut inatsisaat una malillugu meeqqat pillugit suliasani suliarinninnernut siunnersuisoqarnermut, ilitsersuisoqarnermut nakkutilliinernullu suliaqassalluni.

§ 13. Suliap suliarineranut paasissutissat pingaaruteqarluinnarpata, Isumaginninnikkut Aqutsisoqarfik kommunalbestyrelse qinnuigisinnaavaa sulinerminut atasumik sulianut aalajangersimasunut paasissutissat inummut tunngasut mianernartuusullu, nassiuteqqullugit.

Imm. 2. Kommunalbestyrelsip imm. 1 naapertorlugu paasissutissat inummut tunngasut taamaallaat ingerlateqqissinnaavai innuttaasup suliame pineqartumi akuersineratigut, taamaattoq tak. imm. 3.

Imm. 3. Imm. 2-mi allassimasutut akuersisoqanngippat imaluunniit allanik pissuteqarluni akuersisitsisoqarsinnaanngippat, suliame pissutsit, soorlu innuttaasup inatsisitigut innarlitsaalisaanera eqqarsaatigisariaqarpat, inuk pineqartoq pillugu paasissutissat kommunalbestyrelsip tunniussinnaavai.

§ 14. Kommunalbestyrelsip noqqaaneratigut Isumaginninnikkut Aqutsisoqarfik suliasanik ukununga tunngasunik suliaqarsinnaavoq:

- 1) isumaginninnermi sulianik misissuineq, tak. § 45,
- 2) ikiorsiissamik suliniuteqarnerit, tak. kapitali 7,
- 3) ikiorsiissamik suliniuteqarnerit immikkut ittut, tak. kapitali 8,
- 4) ikiorsiissamik suliniuteqarnerit sukannernerit, tak. kapitali 9, aamma
- 5) ikiorsiissamik suliniuteqarnermik suliniuteqarnerullu kingorna malitseqartitsinermik unitsitsineq, tak. kapitali 9.

Imm. 2. Isumaginninnikkut Aqutsisoqarfik suliap aalajangiivigineqarnera pillugu tunngavilersukkamik kommunalbestyrelsimut allaganngorlugu inassuteqaateqassaaq.

Kapitali 5

Nalunaaruteqartussaataaneq

Nalinginnaasumik nalunaaruteqartussaataaneq

§ 15. Innuttaasoq kinaluunniit ilisimasaqaleruni meeqqap ingerlalluannginneranik, peqqissusianik ineriartorneranilluunniit navianartorsiortitsisumik meeqqap inuunermi atugaqarneranik kommunalbestyrelsimut nalunaaruteqarnissamik pisussaaffeqarpoq.

Imm. 2. Sapaatip akunnera qaangiutsinnagu nalunaarutiginninneq tiguneqarpat kommunalbestyrelse innuttaasumut allakkatigut ilisimatitsissaaq nalunaarutiginninneq tigusimallugu.

Nalunaaruteqarnissamut pisussaaffik sakkortunerusoq

§ 16. Innuttaasoq kinaluunniit isumaginnittoqarfimmi, atuarfeqarfimmi peqqinnissaqarfimmiluunniit kiisalu ulluunerani paaqqinnittarfinni sulisunut sulinerminut atatillugu Inatsisartut Inatsisaat una malillugu meeqqamik ikiorserneqarnissamik pisariaqartitsisumik ilisimasaqaleruni, kommunalbestyrelsimut ingerlaannartumik nalunaaruteqarnissaminut sakkortunerusumik pisussaaffeqarpoq. Taamatuttaaq nalunaaruteqartussaataanermit pisussaaffik innuttaasunik qinikkanik imaluunniit inuiaqatigiinnik sullissinermik tunngaveqartumik suliaqartunut atuuppoq.

Imm. 2. Aammattaaq imm. 1 malillugu nalunaaruteqartussaataaneq aammattaaq atuuppoq sulisoq paasisaqarpat pasitsaassaqarpalluunniit angajoqqaangortussat immikkut ikiorserneqarnissamik pisariaqartitsisut, tak. § 26.

Imm. 3. Sapaatip akunnera qaangiutsinnagu nalunaarutiginninneq tiguneqarpat kommunalbestyrelse sulisumut nalunaarutiginnittumut allakkatigut ilisimatitsissaaq nalunaarutiginninneq tigusimallugu.

Kommunit akunnerminni nalunaaruteqarnissamut pisussaaffiat

§ 17. Ilaqtariit 18-it inorlugit ukiulimmik meerallit kommunimiit kommunimut allamut nuuppata, meerarlu immikkut ikiorserneqarnissamik pisariaqartitsisutut kommunip qimanneqartup isumaqarfifiguniuk, Inatsisartut inatsisaat una tunngavigalugu tamanna pillugu kommune qimanneqartoq kommunimut nuuffigineqartumut allaganngorlugu nalunaaruteqassaaq.

Imm. 2. Ernisoqarnissaa sioqqullugu imaluunniit ernisoqareernerata kingorna angajoqqaangortussat ikiorserneqarnissaannik pisariaqartitsisutut naliliiffigineqarpata, kommune qimanneqartoq imm. 1 malillugu taamaaqataanik nalunaaruteqarnissamut pisussaaffeqarpoq.

Imm. 3. Imm. 1 imaluunniit 2 malillugit nalunaaruteqarnermut atatillugu, suliamut attuumassuteqartut kommunip qimanneqartup nassiutissavai, tassunga ilanngullugit kommunip qimanneqartup naliliinerminut tunngavigisimasai paasissutissat attuumassuteqartut eqikkarneri.

Imm. 4. Ilaqtariit 18-it inorlugit ukiulimmik meerartallit imaluunniit angajoqqaangortussat kommunimut Kalaallit Nunaata avataaniittumut allamulluunniit pisortaqarfimmu assingusumut nuuppata, imm. 1-3 atuutissapputaaq.

Nuna tamakkerlugu nalunaaruteqartarfik

§ 18. Naalackersuisut nalunaaruteqartarnerit pillugit ataatsimut paasissutissiinissamik siunertaqartumik §§ 15-17 malillugit nalunaaruteqarnermut tunngasunik nuna tamakkerlugu nalunaaruteqartarfimmik pilersitsissapput.

Imm. 2. Nuna tamakkerlugu nalunaaruteqartarfimmik ingerlatsineq, isumaginninneq paasissutissanillu katersineq pillugit maleruagassanik erseqqinnerusunik Naalackersuisut aalajangersaasinnaapput.

Nalunaaruteqarnermi kommunip iliuuseqarnissamut pisussaffia

§ 19. Kommunalbestyrelsi nalunaarummik tigusaqaruni, tak. §§ 15, 16 imaluunniit 17, akunnerit 24-t iluanni isumaginninnikkut misissuititsinissamik tunngavissaqarnerisoq aalajangiiffigissavaa tak. § 45.

Imm. 2. Imm. 1 naapertorlugu kommunalbestyrelse isumaginninnermi sullissinikkut misissuinnermik aallartitsinissamik aalajangiippat, tamanna piaarnerpaamik aammalu nalunaarutip tiguneqarneraniit kingusinnerpaamik sapaatit akunneri marluk qaangiutsinnagit misissuineq aallartinneqassaaq.

Imm. 3. Nalunaarummik tigusinnermi isumaginninnikkut misissuineq ikiuigallarnerlu ingerlaannartumik aallartinneqassapput, taamaattoq kingusinnerpaamik akunnerit 24-t iluanni, nalunaaruteqarnerup kommunalbestyrelsi pasitsaassaqartilerpagu uku pillugit:

- 1) paarsinerluttoqarsimaneranik,
- 2) meeqqamik imaluunniit illoqatigiinni inoqtigiit allat akornani nakuusertoqarsimaneranik imaluunniit siorasaarisooqarsimaneranik, imaluunniit

3) meeqqamik kinguaassititigut atornerluisoqarsimanerani.

Imm. 4. Imm. 3 naapertorlugu nalunaarummik tigusaqartoqarnerani, kommunalbestyrelse ingerlaannartumik politiinut nalunaarutisineq pillugu nalunaarutiginnissaaq.

Imm. 5. Kommunalbestyrelsip iliuuseqarnissamut pisussaaffia, qulaani allassimasut imm. 1-imiit 4-mut naapertorlugit, aamma atuutissaaq kommunalbestyrelsip nammineerluni, tassalu nalunaaruteqartoqarnera tunngaviginagu, meeqqamut pissutsit ernumanartoqartut maluginiarpagit.

Kapitali 6

Siunnersuineq

§ 20. Kommunalbestyrelsi meeqqamut, ilaquutaasunut imaluunniit meeqqap isumassuisuinit kiisalu angajoqqaangortussanut meeqqap peroriartornera, atuarnera, ilinniagaqarnera, atugarissaarnera il.il. pillugit siunnersuisinnaavoq. Siunnersuinerup siunertaraa inuttut ajornartorsiulersinnaanermik pinaveersaartitsinissaaq, meeqqallu maannakkorpiaq ajornartorsiutigisaanik ikiorneqarnissaa. Piffissaaq ungasinnerusoq eqqarsaatigalugu siunertaavoq ilaqutariit imaluunniit meeqqamik isumassuisut meeraq peqatigalugu meeqqap ilaqutariillu ajornartorsiutaannik nammineerlutik qaangiiniarsinnaalernissaat.

Imm. 2. Siunnersuineq Inatsisartut inatsisaat una imaluunniit inatsit alla aallaavigalugu immikkoortilluguluunniit ingerlanneqarsinnaavoq imaluunniit ikiorsiinissamik suliniuteqarnermut atasumik ingerlanneqarsinnaalluni. Taamaattumik kommunalbestyrelsip siunnersuinerminut atatillugu eqqumaffigissavaa, meeraq ilaqutariilluunniit imaluunniit meeqqamik isumassuisuusut Inatsisartut inatsisaat una inatsilluunniit alla aallaavigalugu ikiorsiinissamik suliniuteqarfigineqarnissaat pisariaqartinneqarnersoq.

Kapitali 7

Ikiorsiissutit

§ 21. Kommunalbestyrelsip ikiorsiinissamik suliniuteqarnissaaq aalajangissavaa meeqqap immikkut pisariaqartitsineranut annertuumik tamanna pingaaruteqartutut isigineqarpat.

Imm. 2. Kommunalbestyrelsip meeqqamik ilaqutariinnillu oqaloqateqarnermigut ikiorsiinissamik suliniut meeqqap ilaqutariillu ajornartorsiutaannik pisariaqartitaannillu aaqqissuutaasussaaq toqqassavaa. Ikiorsiinissamik suliniummik neqerooruteqartoqartinnagu kommunalbestyrelsip meeraq tusarniaavigereersimassavaa, tak. § 43, isumaginninnikkut misissuereersimassaaq takuuk § 45, aamma iliuusissamik pilersaarummik suliaqareersimassaaq.

Imm. 3. Ikiorsiinissamik suliniummik neqerooruteqarnissamik aalajangerneq tunngavilersuineramik malitseqassaaq, tassani nassuiarneqassalluni ikiorsiinissamik suliniuteqarnermut siunertaanullu tunngaviusoq.

Imm. 4. Kommunalbestyrelse ikiorsiinissamik suliniuteqarnerup neqeroorutigineqarnissaanut imaattunik aalajangiissuteqarsinnaavoq:

1) ilaqutariinnik pikkorissartitsineq, ilaqutariinnik isumasioqatigiissitsineq imaluunniit attaveqaatit peqatigalugit ataatsittoqassasoq,

2) tapersersorteqarnissaaq aamma attaveqartarfeqarnissaaq, tak. § 22,

3) efterskolimiinnermi ikiorsiinissaaq, tassunga ilanggullugu aningaasatigut ikiorsiinissaaq,

4) ikiorsiineq alla meeqqap ineriartorneranik ingerlalluarnissaanillu qulakkeerinninnissamik siunertaqartoq, tassaasinnaavoq aningaasatigut ikiorsiinermik neqerooruteqarneq, tamanna meeqqap angerlarsimaffiup avataanut inissineqarsinnaaneranik pinaveersaartitsisinnaappat imaluunniit pinngitsoortitsisinnaappat, assersuutigalugu inigisap attartorneranut akiligassaqarneq imaluunniit inigisamut akiligassap tulliuuttup akilersinnaannginneranik il.il. pissuteqartumik attartukkamit anisinneqartarialersinnaaneq pinngitsoortinniarlugu.

Imm. 5. Imm. 4, nr. 3-mut atatillugu meeqqap aalajangersimasup sullinneqarnerata ataaniiffigisai efterskolit sullinniakkanik tigusinissaminut naleqquttuussapput.

Imm. 6. Kommunalbestyrelsip imm. 4-mi ikiorsiinissamik suliniuteqarnertut taaneqartunit allaanerusut neqeroorutigisinnaavai, soorlu misiligutitut aaqqissuussinerit.

Imm. 7. Imm. 4-mi nr. 3 naapertorlugu ikiorsiineq Naalakkersuisut malittarisassiuussinnaavaat, kiisalu ikiorsiinissamik suliniutinut allatut isikkulinnut imm. 6 malillugu malittarisassiuussisinnaallutik.

§ 22. Kommunalbestyrelsip meeqqamut taassumalu ilaquataanut isumassuisuinulluunniit tapersersortiliineq attaveqarfigisartagaliinerlu ikiorsiinertut aalajangiiffigisinnaavaat, tak. § 21, imm. 4, nr. 2.

Imm. 2. Tapersersorti attaveqarfigisartagarlu ilaatigut:

1) meeqqap peroriartornerani, atuarnerni, ilinniagaqarnerani il.il. suliassanut tunngasunik siunnersuisinnaavoq aamma

2) meeqqap, ilaquataasut isumassuisuusulluunniit pisariaqartitaat apeqqaatillugit inuttut qanimut ikiuisinnaalluni.

Imm. 3. Kommunalbestyrelsip tapersersortaallunilu attaveqarfigisartagassaq atorfinitsissavaa, taannalu taamatut sulinissamut immikkut piginnaasaqassaaq.

Imm. 4. Atorfininnermut atatillugu aammalu pissutsit immikkut ittut pisariaqarlarsitsippata, tapersersortaallunilu attaveqarfigisartagassaq akuersitinneqassaaq meeqqanik pinerlussimannginnermut kiisalu pillagaasimannginnermut uppernarsaatinik tunniussinissaanut.

Imm. 5. Naalakkersuisut tapersersortaallunilu attaveqarfigisartagassamut pisinnaasanut – piginnaasanullu piumasaqaatit pillugit erseqqinnerusunik malittarisassanik aalajangersaasinnaapput.

Angajoqqaat akisussaanagerat

§ 23. Kommunalbestyrelsip angajoqqaat akisussaanagerat pillugu oqaloqatigiinnissamut angajoqqaatut oqartussaassusilik aggersarsinnaavaat, meeqqap ineriartornera imaluunniit ingerlalluarnera navianartorsiortinneqarpat angajoqqaatut oqartussaassusillip akisussaanerminik naammassinissinnaannginneranik tamanna pissuteqarpat.

Imm. 2. Angajoqqaatut oqartussaassusilimmik oqaloqateqarnissamik aggersaanermut paasissutissat makkununga tunngasut pigineqassapput

1) meeraq atuannngitsuukulappat imaluunniit atuartussaanermit pisussaaffeqarneq naammassineqarsimanngippat,

2) meeraq arlaannik annertussusilimmik arlaannillu sakkortussusilimmik pinerluttuliorsi-mappat,

3) meeraq pissusilersornermigut annertuumik ajornartorsiuteqarpat sungiussiniarnerminiluunniit ajornartorsiuteqarpat, imaluunniit

4) angajoqqaatut oqartussaassusillip meeqqap ajornartorsiutaasa qaangerniarnissaannut kommunalbestyrelsimik suleqateqarumangippat.

Imm. 3. Angajoqqaat akisussaanagerat pillugu oqaloqatigiinnerup kingunerissavaa, angajoqqaatut oqartussaassusilimmu meeqqap ajornartorsiutaasa qaangerneqarnissaannut iluaqutaasussatut naleqquttunik kiisalu siunertamut naammaginartumik naleqquttunik ersarissumillu ataatsimik arlalinnilluunniit pisussaaffiliineq.

Meeqqat akisussaaffeqarnerat

§ 24. Kommunalbestyrelsip meeraq 12-init 17-it angullugit ukiulik meeqqap akisussaaffeqarnera pillugu oqaloqatiginissaanut aggersarsinnaavaa, meeraq pissusilersornermigut ajornartorsiuteqarpat pissusilersorneraluunniit pitsaangitsoq ima isikkoqarpat, meeqqap ineriartorneranut, ingerlalluarnertanut peqqissusaanulluunniit ajoqutaasinnaalluni.

Imm. 2. Meeqqat akisussaaffeqarnerat pillugu oqaloqateqarnissamut aggersaanermi paasissutissat makkununga tunngasut pigineqassapput

1) meeraq atuannigitsuukulappat imaluunniit atuartussaanagermut pisussaaffeqarneq naammassineqarsimangippat,

2) meeraq arlaannik sakkortuumilluunniit pinerluttuliorsimappat, imaluunniit

3) meeraq pissusilersornermigut annertuumik ajornartorsiuteqarpat imaluunniit sungiussiniarnermini ajornartorsiuteqarpat.

Imm. 3. Meeqqap akisussaaffeqarnera pillugu oqaloqatigiinnerup kingunerissavaa meeqqap ajornartorsiutaasa qaangerneqarnissaannut iluaqutaasussatut naleqquttunik aammalu siunertamut naammaginartumik naleqquttunik, ersarissumik ataatsimik arlalinnilluunniit pisussaaffiliinermik taasaqarneq.

Imm. 4. Meeraq aserorterisimappat meeqqat akisussaaffeqarnerat pillugu oqaloqatigiinnerup ilaatut kommunalbestyrelsip meeraq aserukkap aaqqinneqarnissaanut peqataanissaanik piunaffigisinnavaa, angajoqqaatullu oqartussaassusilik erngerlugu tamatuminnga ilisimatinneqassaaq. Meerarli aserukkami aaqqinnissaanut akiliinissaanik piunaffigineqanngisaannassaaq.

Kapitali 8

Ikiorsiissutit immikkut ittut

Aalajangiinissamut pisinnaatitaaffik

§ 25. Kommunalbestyrelsip meeqqap immikkut ittumik ikiorneqartariaqarnera annertuumik pingaarutilittut isigisariaqarpat, immikkut ittunik ikiorsiinissamik suliniuteqarnissat aalajangiiffigissavai.

Imm. 2. Kommunalbestyrelsip ikiorsiinissamik suliniutit immikkut ittut aalajangiiffiginnginnerini meeraq tusarniaqqaarsimassavaa, tak. § 43, isumaginninnikkut sullissinermik misissuisimassalluni, tak. § 45, aammalu iliuusissanut pilersaarusiorsimassalluni, tak. § 46. kommunalbestyrelsip isumaginninnermi sullissinikkut misissuinnermi ajornartorsiutinut pisariaqartitsinernullu paasineqartunut pitsaanerpaamik aaqqiissutaasinnaasut toqqassavai. Iliuusissanut pilersaarut

isumaginninnermi sullissinikkut misissuinnermut atasumik suliarineqartup ikiorsiinissamik suliniuteqarnerup taassumalu siunertaanut suut tunngaviunerinik allaaserinnissalluni.

Imm. 3. Kommunalbestyrelsip meeqqap ikiorsiinissamik suliniuteqarnermik pisariaqartitsinerata isumaginninnermi sullissinikkut misissuinissaq iliussissanullu pilersaarusiornissaq utaqqisinnaangippagit, misissuineq ingerlaqatigalugu imm. 4 malillugu ikiugallarneq aallartissavaa.

Imm. 4. Kommunalbestyrelsip ikiorsiinissamik suliniutit immikkut ittut neqeroorutigineqarnissaat aalajangiiffiginnaavai, soorlu:

- 1) angerlarsimaffimmi suliassanik, perorsaanermik, tarnip pissusaanik ilisimasalimmik, isumaginninnermik allatigulluunniit ikiorsiineq,
- 2) ilaqutariinnik katsorsaaneq, atornerluisuunermik katsorsaaneq tassungaluunniit assingusoq,
- 3) ilaqutariinni paarsisartuni imaluunniit ulloq unnuarlu paaqqinniffimmi oqilisaassilluni inissiineq,
- 4) ulluunerani meeqqat ornittagaanni toqqissisimanartumiitsitsineq, unnulernerani unnuaanerani luunniit ikiuinissamik suliniuteqarneq alla, imaluunniit meeqqamut ikiuinissamik ilinniartitsinissamillu siunertaqartumik paaqqinnittarfimmiitsitsineq, assigisaaniluunniit,
- 5) ornittakkami immikkut ittumik perorsaaviumik inissaqartinneqarneq, imaluunniit
- 6) meeqqap ineriartornerata ingerlalluarnissaalu qulakkeernissaat siunertaralugit ikiorsiineq alla.

Imm. 5. Kommunalbestyrelsip qinnuteqarnerata kingorna Naalakkersuisut ikiorsiinissamik suliniutinik immikkut ittunik imm. 4-milu taaneqartuni allaanerusunik, soorlu misileraalluni aaqqissuussinernik aamma meeqqanut inuusuttunullu suliniuteqareernerup kingorna malitseqartinneqartunut immikkut ittumik perorsaanernik pilersitsisinnaanermik akuersisinnaapput.

Imm. 6. Naalakkersuisut malittarisassanik erseqqinnerusunik aalajangersaaffiginnaavaat:

- 1) imm. 4 malillugu ikiorsiinissamik suliniuteqarnerit immikkut ittut, aamma
- 2) ikiorsiinissamik suliniutit immikkut ittut imm. 4-mi taaneqartunit allaanerusunut, taakkuninngalu imm. 5 malillugu akuersissuteqarneq.

Angajoqqaanngortussanut ikorfartuineq.

§ 26. Kommunalbestyrelse angajoqqaanngortussanut ikiorsiinissamik suliniuteqarnermik neqerooruteqarsinnaavoq, tak. kapitali 7-9, taakku inooriaaserisaat meeqqap suli erniusimanngitsup ingerlalluarneranut, peqqissusianut peroriartorneranullu ulorianartorsiortitsissappata.

Imm. 2. Meeqqap inoorlaap pisariaqartitaanik naammassinninnissamut angajoqqaanngortussat ajornartorsiuteqartussatut kommunalbestyrelsip naliliiffigippagit, kommunalbestyrelse naartunerup nalaani aalajangiissaaq, ikiorsiinissamik suliniuteqarnerit kapitali 7-9-mi allassimasut erninerup kingorna aallartinneqassasut.

Imm. 3. Kommunalbestyrelsip angajoqqaanngortussanut ikiorsiinissamik suliniutit aalajangiiffiginnginnerini isumaginninnikkut sullissinermik misissuisimassaaq, tak. § 45, iliussissanillu pilersaarusiornissamilluni, tak. § 46. Isumaginninnermi sullissinikkut misissuinnermi ajornartorsiutinut pisariaqartitsinernullu paasineqartunut pitsaanerpaamik aaqqiissutaasinnaasut kommunalbestyrelsip toqqassavai. Iliussissanut pilersaarut isumaginninnermi sullissinikkut misissuinnermut atasumik suliarineqartup ikiorsiinissamik suliniuteqarnerup taassumalu siunertaanut suut tunngaviunerinik allaaserinnissaaq. Iliussissanut pilersaarut erninerup siorna kingornalu qanoq ittunik ikiorsiinissamik suliniuteqartoqarnissaanik imaqqassaaq.

Imm. 4. Suliniuteqarneq ataatsimoortitaallunilu ataqatigiissinneqarsimassaaq oqartussaasut attuumassuteqartut suleqatigalugit, pingaartumik peqqinnissaqarfimmi oqartussat.

Kapitali 9

Ikiorsiinissamik suliniuteqarnerit sukannerit

Angajoqqaatut oqartussaassusilimmik akuersititseqqaarluni inissiineq

§ 27. Kommunalbestyrelsip aalajangissavaa meeraq angerlarsimaffiup avataanut inissinneqassanersoq isumaginninnikkut § 45 malillugu misissuinerup takutippagu, meeqqap ikiorserneqarnissamut immikkut pisariaqartitaanik akuersinissamut annertuumik pingaaruteqartoq.

Imm. 2. Kommunalbestyrelse imm. 1 malillugu aalajangiisinnaangilaq, aatsaalli meeraq tusarniarneqaqqaarsimappat, tak. § 43, isumaginninnikkut sullissinermik misissuisoqarsimappat, tak. § 45, aammalu iliussissanut pilersaarusiortoqarsimappat, tak. § 46.

Imm. 3. Meeqqamut pitsaanerpaassusaq eqqarsaatigalugu meeqqap inissittariaqarnerata isumaginninnermi sullissinikkut misissuineq iliussissanullu pilersaarusiorneq utaqqisinnaangippagit, misissuinerup nalaani inissiineq kommunalbestyrelsip aallartissavaa.

Imm. 4. Angajoqqaatut oqartussaassusilik ilaqtutallu allat meeqqap inissinneqarfigisaani ulloq unnuarlu inissisimasinnaanerannik neqeroorfigineqarsinnaapput.

Angajoqqaatut oqartussaassusilimmik akuersititsinani inissiineq

§ 28. Kommunalbestyrelsip angajoqqaatut oqartussaassusilik meerarlunniit akuersiteqqaarnagit meeqqap angerlarsimaffiup avataanut inissinneqarnissaa aalajangissavaa, meeqqap peroriartorneranut, peqqissusianut ineriartorneranullunniit ilungersunartumik ajoquserneqarnissaa aarlerinarluinnarpat makku pissutigalugit:

- 1) meeqqamut amigartumik isumassuisoqarpat isumassuisoqanngippallunniit,
- 2) timikkut tarnikkullunniit persuttaaneqarsimappat, paarsinerluttoqarsimappat kinguaassiutitigullunniit innarliisoqarsimappat,
- 3) meeqqami imaluunniit meeqqap qanigisaanik atornerluinermik ajornartorsiuteqartoqarpat, pinerlunniartartoqarpat allatigullunniit inuuniarnikkut annertuunik ajornartorsiuteqartoqarpat, imaluunniit
- 4) meeqqami meeqqallunniit qanigisaanik pissutsikkut naleqqussarnissamut allatigullunniit ajornartorsiuteqartoqarpat,

Imm. 2. Imm. 1 malillugu taamaallaat aalajangiisoqarsinnaavoq, ajornartorsiutit meeqqap angerlarsimaffimmi najugaqaannarneratigut aaqqinneqarsinnaangitsut kommunalbestyrelsip tungavissalimmik ilimagippagu.

Imm. 3. Kommunalbestyrelse imm. 1 malillugu aalajangiisinnaangilaq, aatsaalli isumaginninnikkut sullissinermik misissuisoqarsimappat, tak. § 45, aammalu iliussissanut pilersaarusiortoqarsimappat, tak. § 46. Aammattaaq kommunalbestyrelsip meeraq tusarniarfigisinnaassavaa, tak. § 43, tassungalu atasumik meeraq angajoqqaatullu oqartussaassusilik nalunaarfigisimassallugit meeqqap illersuisoqarnissaanik pisinnaatitaaffeqarneranik, tak. § 44. Angajoqqaatut oqartussaassuseqartup

najugaa imaluunniit sumiiffia ilisimaneqanngippat nalunaarut meeqqamik isumassuisuusumut tunniunneqassaaq.

Imm. 4. Meeqqamut pitsaanerpaasussaq eqqarsaatigalugu meeqqap inissittariaqarnerata isumagininnermi sullissinikkut misissuineq iliuusissanullu pilersarusiorneq utaqqisinnaanngippagit, misissuinerup nalaani inissiineq kommunalbestyrelsip aallartissavaa.

§ 29. § 28 malillugu kommunalbestyrelsip angerlarsimaffiup avataanut akuersititseqqaarnani inissiinermik akuersissuteqarneq angajoqqaatut oqartussaassusilimmut imaluunniit meeqqamik isumaginittuusumut sapinngisamik akunnerit 24-t qaangiutsinnagit nalunaarutigisimassavaa. Nalunaarut inissiinermik aalajangiisoqarnerata sumik tunngaveqarneranik imaqassaaq kiisalu naammagittaalliorsinnaanermut ilitersuut.

Imm. 2. Angerlarsimaffiup avataanut inissiinermik aalajangerneq akuersinermik akuersinertaqanngitsumilluunniit pisimappat, aalajangiisoqarnerata kingorna ullut arfineq-pingasut qaangiutsinnagit Naalakkersuisunut nalunaarutigineqassaaq.

Kapitali 10

Inissiiffiit

Aalajangiinissamut pisinnaatitaaffik

§ 30. Kommunalbestyrelsip inissiiffissaq aalajangiiffigissavaa meeqqap pisariaqartitaanik nalilersuineq aammalu isumagininnikkut sullissinermik misissuineq, tak. § 45, aallaavigalugit. Inissiiffissamik toqqaanerup iliuusissanut pilersaarummi inissiinermut siunertatut taaneqartut tunngavissaqartissavai aammalu meeqqap inissinneqarnerata ingerlaneranik ataqatigiittoqarnissaa qulakkiissallugu.

Imm. 2. Meeqqap inissinneqarfia tassaasinnaavoq:

- 1) kommunip aaqqissuusaaq ilaqutariinni paarsisartuni inissinneqarneq, tak. § 37,
- 2) ulloq unnuarlu paaqqinniffik, tak. § 33,
- 3) ulloq unnuarlu paaqqinniffimmi isumannaallisaavigisamik immikkoortortaarfik, tak. § 36, imaluunniit
- 4) nammineq ineerarisaq, inissiani inigisaq, najugaqatigiiffiit, efterskolit assigisaalluunniit.

Imm. 3. Meeraq pingasut inorlugit ukiulik inissinneqarpat, meeqqap pingasunik ukioqalernissaa sioqqullugu inissiiffimmut allamat nuunneqarsinnaanngilaq, aatsaalli immikkut illuinnartunik pissutissaqartoqarpat taamatut iliortoqarsinnaalluni.

Imm. 4. Inissiineq pillugu maleruagassanik erseqqinnerusunik Naalakkersuisut aalajangersaasinnaapput, tassunga ilanngullugit uku pillugit:

- 1) misissuineq,
- 2) inissiinerup sivisussusissaa,
- 3) inissiiffimmik allanngineq,
- 4) inissiinerup ingerlaqqinnissaa unitsinneralu aamma
- 5) qatanngutigiinnik inissiinerit.

Imm. 5. Aamma inissiinerup nalaani neqeroorutit inerteqqutillu pillugit maleruagassanik erseqqinnerusunik Naalakkersuisut aalajangersaasinnaapput, tassunga ilanngullugit uku pillugit

maleruagassat:

1) inissiinerup nalaani meeqqamut pulaarnejq attaveqarnerlu, aamma

2) inissiinerup nalaani immikkut eqqarsaatigisassat.

§ 31. Kommunalbestyrelsip qulakkiissavaa meeqqat Kalaallit Nunaanni inissinneqarnissaat, taamaattoq tak. imm. 2.

Imm. 2. Meeqqap pisariaqartitai Kalaallit Nunaanni naammassineqarsinnaanngippata aamma Kalaallit Nunaanni inissiinissamut periarfissaarutivippat Naalakkersuisut akuersiteqqaarlugit Kalaallit Nunaata avataanut inissiisoqarsinnaavoq.

Imm. 3. Naalakkersuisut Kalaallit Nunaata avataanut inissiinernut malittarisassanik erseqqinnerusunik aalajangersaasinnaapput.

§ 32. Meeraq imaluunniit inuusuttoq suliniuteqareermermi malitseqartitsilluni suliniuteqarfigineqartoq nunagisap avataani angerlarsimaffiup avataanut inissinneqarsimasoq angerlarsimaffimminut ukiumut marloriarluni tikeraarluni angalatinneqarsinnaavoq.

Imm. 2. Meeqqamut ajunnginnerussappat, tikeraarluni angalanermut taarsiullugu angajoqqaatut oqartussaassusilinnut qanigisaasumulluunniit allamut tunniunneqarsinnaavoq, taamaalilluni taanna meeqqap imaluunniit inuusuttup suliniuteqareermermi malitseqartitsilluni suliniuteqarfigineqartup inissinneqarfigisaanut tikeraarsinnaanngorlugu. Illusimatitsinermut aningaasartuutit kommunalbestyrelsimit akilerneqassapput.

Imm. 3. Meeraq imaluunniit inuusuttoq suliniuteqareermermi malitseqartitsilluni suliniuteqarfigineqartoq nunagisap avataani angerlarsimaffiup avataani efterskolertoq ukiup efterskolerfiusup ingerlanerani angerlarsimaffimminut ukiumut ataasiarluni tikeraarluni angalatinneqarsinnaavoq. Tikeraartitsilluni angalanissamut imm. 2 naapertorlugu akiliussinissamut periarfissaqarpoq.

Imm. 4. Naalakkersuisut tikeraarluni angalasarnerit pillugit erseqqinnerusumik malittarisassiorsinnaapput, matumani aningaasartuutit ilanngullugit.

Ulloq unnuarlu paaqqinniffiit

§ 33. Ulloq unnuarlu paaqqinniffinni inissat pisariaqartinneqartutut amerlassusillit pigineqarnissaat Naalakkersuisut isumagisassaraat, tassunga ilanngullugit ulloq unnuarlu paaqqinniffiit immikkoortortaqrifiini isumannaallisakkani inissat.

Imm. 2. Ulloq unnuarlu angerlarsimaffiit Naalakkersuisunit, kommunalbestyrelsinik ataatsinik arlalinnilluunniit ataatsimoorunneqarlutik imaluunniit paaqqinnittarfinnit imminnut pigisunit pilersinneqarlutillu ingerlanneqarsinnaapput.

Imm. 3. Ulloq unnuarlu paaqqinniffiit immikkoortortaqrifiit isumannaallisakkat Naalakkersuisunit, kommunalbestyrelsinik ataatsinik arlalinnilluunniit ataatsimoorunneqarlutik pilersinneqarlutillu ingerlanneqarsinnaapput.

Imm. 4. Ulloq unnuarlu paaqqinniffiit tak. imm. 2, Naalakkersuisunit ukiumoortumik nalunaarusiortassapput. Naalakkersuisut Inatsisartut upernaakkut ataatsimiinneranni ukiumoortumik nalunaarusiamik Inatsisartunut agguaassisassapput.

Imm. 5. Ulloq unnuarlu paaqqinniffiup kommunalbestyrelsimik suleqateqarluni isumaginninnermi

sullissinernik allanik suliaqarsinnaanera Naalackersuisut malittarisassiuussinnaavaat.

§ 34. Ulloq unnuarlu paaqqinniffiit tak. § 33, imm. 2, matumani ulloq unnuarlu paaqqinniffinni immikkoortortat isumannaallisakkat ilanngullugit, tak. § 33, imm. 3, Naalackersuisunit akuerineqarsimassapput. Aammattaaq Naalackersuisunik ingerlatsinermut atuuttumik isumaqatigiissusiortoqarsimassaaq

Imm. 2. Ulloq unnuarlu paaqqinniffinnut maleruagassanik erseqqinnerusunik Naalackersuisut aalajangersaassapput, matumani ulloq unnuarlu paaqqinniffinni immikkoortortat isumannaallisakkat ilanngullugit, kiisalu ulloq unnuarlu paaqqinnittarfinnut innersuussisarnernut naammagittaalliorsinnaanermullu periarfissamik.

Imm. 3. Naalackersuisut ulloq unnuarlu angerlarsimaffiit pillugit erseqqinnerusunik malittarisassanik aalajangersaasinnaapput, matumani ulloq unnuarlu angerlarsimaffinni immikkoortortat isumannaallisakkat kiisalu ulloq unnuarlu angerlarsimaffinni sulisunut pisortanullu tamanut tunngatillugit pillagaasimannginnermik meeqqanillu pinerliisimannginnermut uppernarsaatit ilanngullugit.

§ 35. Ulloq unnuarlu paaqqinniffiit, matumani angerlarsimaffimmi isumannaallisakkanik immikkoortortallit ilanngullugit, meeqqanik ulloq unnuarlu paaqqinniffimmut inissinneqartitserusuttunut tigusinissaminnut pisussaataapput ulloq unnuarlu paaqqinniffik inissaqarpat, inissiinerlu ulloq unnuarlu paaqqinniffiup siunertaanut suliniuteqarfigmaanullu naapertuuppat. Aalajangersagaq § 36 malillugu inissinerni il. il. aamma atorneqassaaq.

Imm. 2. Imm. 1-imi piumasagaatit eqqortinneqarnersut pillugit kommunalbestyrelsip ulloq unnuarlu paaqqinniffiup akornanni isumaqatigiinngittoqarpat isumaqatigiinngissutaasoq Naalackersuisunut aalajangigassanngorlugu saqqummiunneqassaaq.

Imm. 3. Naalackersuisut aalangiinerat, tak. imm. 2, naammagittaalliuutigineqarsinnaanngilaq erngelunilu malinneqassalluni.

§ 36. Kommunalbestyrelsip aalajangersinnaavaa meeraq §§-it 27 imaluunniit 28 malillugit inissinneqarsimasoq, ulloq unnuarlu paaqqinniffiup immikkoortortaanut isumannaallisakkamut inissinneqassanersoq. Immikkoortortat isumannaallisakkani matut silarliit igalaallu parnaarsimajuartinneqarsinnaapput. Ulloq unnuarlu paaqqinniffiup immikkoortortaanut isumannaallisakkamut inissinissaq taamaallaat aalajangiiffigineqarsinnaavoq, ukua tunngavigalugit:

- 1) Meeraq aqqaneq-marluk 15-illu akornanni ukioqartoq sakkortuumik inatsisinik unioqutitsisimappat, meeqqap allaluunniit isumannaatsuutinnissaat eqqarsaatigalugit ulloq unnuarlu paaqqinniffiup immikkoortortaanut isumannaallisakkamut inissiisariaqarneq pisariaqartinneqarluinnalersimappat.

Imm. 2. Aammalu ulloq unnuarlu paaqqinniffiup immikkoortortaa isumannaallisagaq meeqqanut 15-it 18-illu akornanni ukiulinnut atorneqarsinnaavoq pisuni ukunani:

- 1) Meeraq tigusarineqarsimappat tigusarinninnerlu eqqartuussinermut inatsit § 358 malillugu eqqartuussiviup angerlarsimaffik inissiiffilluunniit alla naleqquttuosorippagu tak. § 361, imm. 2, nr. 3-lu.

- 2) Meeraq tigummigallarneqarpat eqqartuussivillu aalajangersimappat eqqartuussinermut inatsimmi § 359 malillugu angerlarsimaffimmi paaqqinniffimmiluunniit naleqquttumi inissinneqassasoq, tak. § 361,

imm. 2, nr. 3-lu.

3) Meeraq eqqartuussinermut inatsimmi kapitali 30 malillugu isertitsivimmiittussanngorlugu nakkutigineqartussanngorlugulu eqqartuunneqarsimappat, eqqartuussinermut inatsimmi kapitali 31 malillugu isertitsivimmut inissinneqartussatut eqqartuunneqarsimappat imaluunniit eqqartuussinermut inatsimmi kapitali 32 malillugu inuusuttunut pinerluuteqartartunut immikkut ittunik ikiorsiissutigineqartartunik ikiorserneqarnissamut eqqartuunneqarsimappat.

Imm. 3. Kommunimi meeqqap tigusarineqarnerata tiggummigallarneqarneratalu nalaani najugaqarfigisaani kommunalbestyrelse, pisuni imm. 2, nr. 1-imi aamma nr. 2-mi allassimasutut, piaarnerpaamik, kingusinnerpaamilli akunnerit 72-it iluanni, tiggumminnikkallartussanik isumannangitsutut politiinit nalilerneqartunik pissarsiniassaaq.

Imm. 4. Kommunalbestyrelse immikkoortortamut isumannaallisakkamut inissiinissamik aalajangiissaaq imm. 2, nr. 3-mi taaneqartut tunngavigalugit. Kommunalbestyrelsip pisuni pineqartuni inissiinerup sivissusissaa suullu malinneqarsinnaanerat pillugit aalajangiissaaq, tak. Pinerluttulerinermut Inatsimmi § 153. Kommunimi meeqqap tigusarineqarnerata tiggummigallarneqarneratalu nalaani najugaqarfigisaani kommunalbestyrelse tassaassaaq piginnaasutut isigineqartussaaq.

Ilaqutariit paarsisartut

§ 37. §§-it 27 imaluunniit 28 malillugit kommunip aqqissugaanik meeqqat ilaqutariinnut paarsisartunut, tassunga ilanngullugit inuussutissarsiutigalugu nalinginnaasumillu ilaqutariinnut paarsisartunut inissinneqarsimasinnaapput.

Imm. 2. Ilaqutariit paarsisartut imm. 1 malillugu kommunimi ilaqutariit paarsisartut najugaqarfigisaanni kommunalbestyrelsip atsiugaanik allaganngorlugu paarsisuunissamut akuersissummik peqassapput, ilaqutariillu paarsisartut § 8, imm. 3 malillugu kommunimit nakkutigineqassapput.

Imm. 3. Kommunalbestyrelsip inissiisuusup, meeqqap ilaqutariinnut paarsisartunut inissinneqarneranut akisussaasup, ilaqutariit paarsisartut meeqqalluunniit qinnuteqarnerata kingorna, aalajangersinnaavaa meeqqap ilaqutariinnit paarsisartunit inissiiffissamut allamut nuutsinneqannginnissaa, meeqqap ilaqutariinni paarsisartuni inissisimanagera meeqqamut pitsaanerpaatut isigineqartariaqarpat, tak. § 2. Aammattaaq aalajangiivigineqarsinnaavoq meeqqap angajoqqaatut oqartussaassuseqartunut angerlartinneqannginnissaa, meeqqap ilaqutariinni paarsisartuni inissisimanagera meeqqamut pitsaanerpaatut isigineqartariaqarsorinarpat, tak. § 2.

Imm. 4. Angajoqqaani aappaa kisimi angajoqqaatut oqartussaassuseqarsimappat aamma angajoqqaap aappaani meeraq ilaqutariinni paarineqartutut inissinneqarsimappat imm. 2- 3-milu malittarisassat atuutissanngillat.

Imm. 5. Ilaqutariinnut paarsisartunut akuersissummi piimasaqaatit atuukkunnaarsimappata ilaqutariinnut paarsisartunut akuersissut kommunalbestyrelsimit utertinneqassaaq.

Imm. 6. Ilaqutariinnut paarsisartunut akuersissutip saniatigut meeqqat inissinneqarsimasut tamarmik immikkut paarineqarnissaannut akuersissummik kommunalbestyrelse inissiisuusooq ilaqutariinnut paarsisartunut atulersitsissaaq. Tamanna kommunip aqqissugaanik ilaqutariinni paarsisartuni inissiinissaaq sioqqullugu pissaaq, kommunalbestyrelsillu meeqqap inissinneqarnissaanik

kissaateqartup meeqqap qanoq ikiorserneqartariaqartiginera ilaqutariillu paarsisartut meeqqanik qassinik isumassuisinnaassuseqarnerat isummerfigisimassavaa.

Imm. 7. Naalakkersuisut ilaqutariit paarsisartut pillugit malittarisassanik erseqqinnerusunik aalajangersaasinnaapput, soorlu:

- 1) ilaqutariinnut paarsisartunut piumasaqaatinik,
- 2) aanngajaarniutinut atuisimanermut misilitsinneq
- 3) ilaqutariit paarsisartut sulineranni atugassarititaasunik, aningaasanut tunngatillugu atugassarititaasut ilanngullugit, soorlu akissarsianut tunngasut il.il.
- 4) ilaqutariinnut paarsisartunut akuersissummik tunniussinissamut utertitsinissamullu piumasaqaataavoq, matumani inuit 15-it sinnerlugit ukiullit tamarmik ilaqutariinni paarsisartuniittut meeqqanik pinerliisimanginnerannut pinerluuteqarsimanginnermullu uppersaatinik pigisaqassasut.
- 5) kommunalbestyrelsip ilaqutariinnut paarsisartunut akuersissutinik atulersitsinnginnermini paasissutissat suut pissarsiarisassanera,
- 6) ilaqutariinnut paarsisartunut akuersissummi paasissutissat suut allassimassanersut,
- 7) meeravissiartaarnissaq siunertaralugu ilaqutariinnik paarsisartunik pilersitsinermi pissutsit pillugit malittarisassat immikkut ittuusinnaapput, aamma
- 8) Qanigisanut inissiineq

§ 38. Kommunalbestyrelsip kommunip aaqqissugaanik ilaqutariit paarsisartut meeqqanik ataasiakkaanik inissiinissaq sioqqullugu paarsisutut suliasanuk sukumiisumik paasissutissinneqarluarsimanissaat qulakkiissavaa. Kommunip aaqqissugaanik ilaqutariit paarsisartut meeqqap inissinneqarneranut tunngaviusumik iliusissanuk pilersaarutip assileqqinneranik tunineqassapput, tak. § 46.

§ 39. Angajoqqaatut oqartussaassusillip meeraq allamut namminiunngitsumi najugaqartissimappagu nammineq aaqqissuussamik ilaqutariinni paarsisitsinerusimassaaq pisortanit aningaasarsiartaqanngitsoq.

Imm. 2. Nammineq aaqqissuussamik ilaqutariit paarsisut meeraq ulloq unnuarlu qaammatit tulleriiginnaat aqqaneq-marluk iluini qaammatinik pingasunik sivisunerusuni tigummissanngilaat kommunemi ilaqutariit paarsisartut najugaanni kommunalbestyrelsimit meeqqanik ataasiakkaartunik paarsinissamut akuersissummik pigisaqaratik.

Imm. 3. Paarsinissamut akuersissut taamaallaat tunniunneqarsinnaavoq ilaqutariinnik paarsisartunik misissuinerup kingorna inissiinissaq meeqqamut iluaqutaasussatut ilimagineqaraangat.

Imm. 4. Kommunalbestyrelsip kommunimi meeqqanik nalinginnaasumik nakkutilliinermi ilaatut, tak. § 8, imm. 1, meeqqallu nammineq aaqqissuussamik ilaqutariinnut paarsisartunut inissinneqartut paarineqarnissamik akuersissutillit nakkutigisassarai.

Imm. 5. Angajoqqaaviit, angajoqqaatut oqartussaaffimmik tigumminningitsut, aalajangersakkami pineqanngillat.

Imm. 6. Naalakkersuisut ukununnga ersarinnerusunik malittarisassiorsinnaapput:

- 1) Kommunalbestyrelsen ilaqutariinnut paarsisartunut akuersisarnerinut atorunnaarsitsisarnerinullu
- 2) Paasissutissat suut kommunalbestyrelsip pissarsiarisimasariaqarai ilaqutariittut paarsisartutut akuersinnginnermi, aamma

3) Paasisutissat suut paarsaqarsinnaanermut akuersissummi takuneqarsinnaassanersut.

Kapitali 11

Ikiorsiinissamik suliniuteqarnerit suliniuteqareernermilu malitseqartitsinerup unitsinneri

Ikiorsiinermi suliniutit unitsinneqarneri

§ 40. Ikiorsiinissamik suliniuteqarnerit, ikiorsiinissamillu suliniuteqarnerit immikkut ittut kiisalu ikiorsiinissamik suliniuteqarnerit sukannernerit, tak. kapitalini 7-9-ni aalajangersakkat, kiisalu tamakku pillugit suliniuteqareernermi malitseqartitsilluni suliniutit unitsinneqassapput, taakku malillugit sulinermi anguniarneqartut anguneqarpata, imaluunniit ikiorsiinermik suliniuteqarnikkut siunertarineqartut tunngavissaarukkaangata.

Imm. 2. Inatsisartut inatsisaat una malillugu ikiorsiinissamik suliniuteqarnerit kommunalbestyrelse suliniuteqareernermi malitseqartitsinissamik aallartitsisoqarnissaanik aalajangiingippat, unitsinneqassapput meeraq 18-inik ukioqalerpat takuuk § 42.

§ 41. Angerlarsimaffiup avataani inissiinerup atorunnaarsinnissaa pillugu kommunalbestyrelsip aalajangiinissaa sioqqullugu, kommunalbestyrelsip qulakkeersimassavai:

- 1) angajoqqaatut oqartussaassusillip, ilaatigut Inatsisartut Inatsisaat una malillugu, ikiuinissamik suliniuteqarfigineqarluni meeqqap pisariaqartitaanik naammassinnissinnaanera,
- 2) meeqqamik oqaloqatiginnittoqarsimanera, tak. § 43,
- 3) inissiiffiusumit allaganngorlugu oqaaseqaammik pissarsiniartoqarsimanera,
- 4) meerqqap angajoqqaallu angerlartitsinissamut piareersarluarsimanerat, aamma
- 5) § 46 naapertorlugu angerlartitsinissamut iliuusissanut pilersaarusiortoqarsimanera kiisalu meeqqap angajoqqaatullu oqartussaassusillip piffissami angerlartitsinerup siuninngua kingornalu meeqqap attaveqarfigisartagarisimasinnaasaasa ikiorserneqarnissaannik piareersaasoqarsimanera.

Imm. 2. Kommunalborgbestyrelsip inissiinerup unitsinnissaanut tunngatillugu aalajangiinginnermini akisussaaffigaa inissiiffimmiit allaganngorlugu oqaaseqaammik pissarsiniartoqarsimanissaa, tak. imm. 1, nr. 3. Inissiiffiup oqaaseqaammimi inassutigippagu meeqqap inissiiffigisaminiiginnarnissaa kommunalborgbestyrelsip Meeqqat Pillugit Paasisimasalittut Qitiusumik Ataatsimiitsitaliap allattoqarfia ilisimatissavaa. Meeqqat Pillugit Paasisimasalittut Qitiusumik Ataatsimiitsitaliap allattoqarfiata aalajangersinnaavaa suliasaq Meeqqat Pillugit Paasisimasalittut Qitiusumik Ataatsimiitsitaliamut oqaaseqarfigisassanngorlugu saqqummiunneqassanersoq, tak. § 53.

Imm. 3. Angerlartitsinissaq pisinnaanngilaq meeraq, angajoqqaatut oqartussaassusilik inissiiffillu minnerpaamik sapaatit akunnerinik aqqaneq-marlunnik sioqqutsilluni nalunaarutigisimannngikkaanni, angerlartitsisoqarsinnaavorli meeqqap eqqarsaatiginera allalluunniit pingaarutillit eqqarsaatiginerat pissutigalugit sioqqutsilluni ilimasaaruteqarnissap killissaanik saneqqutsisariaqalersitsillugu.

Imm. 4. Kalaallit Nunaata avataani inissiisoqarsimatillugu, inissiinerup unitsinneqarnissaa pillugu aalajangiinissaq sioqqullugu, nunami allami kommunimit najugaqarfigisamit allaganngorlugu nassuiaammik kommunalborgbestyrelse sapinngisamik pissarsiniassaaq.

Inuusuttunut 18-iniit 23-t ilanngullugit ukiulinnut suliniuteqareernermi malitseqartitsilluni

§ 42. Kommunalbestyrelsip inuusuttut 18-iniit 23-t ilanngullugit ukiullit 18-iniliinermi kapitalini 7-9-ni allassimasut malillugit ikiorsiinissamik suliniuteqarfigineqartut suliniuteqareermermi malitseqartitsilluni suliniuteqarnissamik neqeroorfigineqassanersut aalajangiiffigissavai.

Imm. 2. Kommunalbestyrelse suliniuteqareermermi malitseqartitsilluni suliniuteqarnissamik inuusuttup ingerlalluarneranut, peqqissusaanut ineriartorneranullu annertuumik pingaaruteqartut isigineqarpat neqerooruteqassaaq.

Imm. 3. Kommunalbestyrelsip inuusuttunut 18-iniit 23-t ilanngullugit ukiulinnut suliniuteqareermermi malitseqartitsilluni suliniuteqarnissap neqeroorutigineqarsinnaanera neqeroorutigineqaqqissinnaanera aalajangiiffigissinnaavaa:

- 1) inuusuttup suliniuteqareermermi malitseqartitsisumik suliniuteqarfigineqarnissamik siusinnerusukkut itigartitsisimanini peqqissimissutigippagu sulilu pisariaqartitsilluni paasippagu,
- 2) inuusuttup inissisimanera allannguuteqarsimappat, taamaalilluni kingusinnerusukkut suliniuteqareermermi malitseqartitsinissaq pisariaqartinneqalerluni, imaluunniit
- 3) suliniuteqareermermi malitseqartitsineq unitsinneqarsimappat, tak. § 40, tamannalu pisariaqartinneqaqqilerluni.

Imm. 4. Suliniuteqareermermi malitseqartitsineq tassaasinnaavoq:

- 1) § 22 naapertorlugu tapersersorteqartitsineq attaveqarfigisartagaqartitsinerlu.
- 2) kapitali 7-9-ni taaneqartut ikiorsiinissamik suliniuteqarnerit, imaluunniit
- 3) ikiorsiinerit allat Inatsisartut inatsisaat una malillugu naapertuuttut inuusuttup nammineerluni inuuneqalernissaanut pitsaasumik ikaarsaariarnermut tapertaasussatut siunertaqartut.

Imm. 5. Inuusuttoq angerlarsimaffiup avataanut inissinneqarsimappat §§-it 27 imaluunniit 28 malillugit suliniuteqareermermi malitseqartitsineq aamma tassaasinnaavoq maannakkut inissinneqarfigisami allamiluunniit naleqqunnerusumi ulloq unnuarlu najugaqartinneqartoq.

Imm. 6. Suliniuteqareermermi malitseqartitsineq neqeroorutigineqassanersoq nalilersorumallugu, meeqqap 18-inik ukioqalernissaa kingusinnerpaamik qaammatinik arfinilinnik sioqqullugu kommunalbestyrelsip meeraq attavigissavaa.

Imm. 7. Suliniuteqareermermi malitseqartitsineq pillugu maleruagassanik erseqqinnerusunik Naalakkersuisut aalajangersaasinnaapput, tassunga ilanngullugit suliniuteqareermermi malitseqartitsinerup annertussusissaa, sivissusissaa qanorlu isikkoqarnissaa.

Kapitali 12

Sulianik suliarinninnermi malittarisassat

Meeqqamik oqaloqatiginninneq

§ 43. Kapitalini 7-9-ni aalajangersakkat naapertorlugit meeqqamik ikiorsiinissamik suliniuteqarnernik kiisalu kapitali 11-mi aalajangersakkat naapertorlugit ikiorsiinissamik suliniuteqarnernik unitsinissanik aalajangiisoqalersinnagu, meeraq oqaloqatigineqaqqaassaaq.

Imm. 2. Meeqqamut pitsaanerpaasussaq orniginarpat, oqaloqateqarneq angajoqqaatut oqartussaasoq akuersiteqqaarnagu najuutsinnaguluunniit pisinnaavoq.

Imm. 3. Oqaloqatiginnissaaq pinngitsoortinneqarsinnaavoq meeqqap perorsimassusia imaluunniit

oqaloqatigiinnerup ingerlanneqarnissaanut suliap qanoq ittuunerata aalajangiisumik oqaloqatigiinnissaq pissannqitsutut isikkoqartippagu. Oqaloqatigiinneq naammassineqarsinnaanngippat, aalajangiinissatut eqqarsaatigineqartumut meeqqap isumaa allatut iliornikkut pissarsiariniarneqassaaq.

Imm. 4. Naalakkersuisut meeqqat pillugit sulianik suliarinninneq pillugu maleruagassanik erseqqinnerusunik aalajangersaasinnaapput, ilaatigut makku pillugit:

- 1) meeqqamik oqaloqateqarneq,
- 2) meeqqat pillugit suliani oqartussat akornanni paasisutissanik paarlaasseqatigiinneq, aamma
- 3) suliamik suliarinninnermut attuumassuteqartut pissutsit allat.

Meeqqanik illersuisoq

§ 44. Kommunalbestyrelsip suliarinninneranut atatillugu meeqqap ikiorserneqarnissaanut suliniuteqarnermik aallartitsinermi, meeqqap meeqqanik illersuisumit ikiorneqarnissaa neqeroorutigisinnaavaa. Suliap suliarineqarnerata nalaani meeqqanik illersuisup meeqqap pisinnaatitaaffiinik qulakkeerinninnissaq meeqqallu tusarneqarnissaa peqataaffigissavai. Meeqqanik illersuisup meeqqat atugaat suliamigut immikkut paasisimasaqarfigissavai imaluunniit meeqqanik illersuisussatut pikkorisarsimassalluni. Meeqqanik illersuisussamik toqqaaneq angajoqqaatut oqartussaassusilimmit akuerineqaaqqaartariaqanngilaq.

Imm. 2. Meeqqat angajoqqaatut oqartussaassusilimmit akuerineqanngitsumik angerlarsimaffiup avataanut inissinneqartut, tak. § 28, meeqqanik illersuisulerneqartassapput.

Imm. 3. Meeqqat ulloq unnuarlu angerlarsimaffimmi immikkoortortaqaarfimmu isumannaallisakkamut inissinneqartussatut eqqarsaatigineqartut inissinneqareersimasulluunniit, meeqqanik illersuisulerneqartassapput.

Imm. 4. Meeqqanik illersuisup illersuisutut atorfininnerminut atatillugu pissutsit immikkut ittut pisariaqartitsippata meeqqanik pinerliisimanginnermut uppernarsaammik pinerluuteqarsimanginnermullu uppernarsaammik pissarsinissamut akuersissuteqarsinnaanngorlugu pisussaaffilerneqassaaq.

Imm. 5. Naalakkersuisut toqqaanissamut, akissarsiaqartitsinissamut, meeqqanut pinerluuteqarsimanginnermut pinerlussimanginnermullu uppernarsaammik aallernissamut, piukkunnaateqarnermut piginnaasanullu piumasaqaatinik qanoq ittunik meeqqanik illersuisumut piumasaqaataasussat pillugit malittarisassiussapput, tak. imm. 1. Ikiorserneqarnissaa pillugu maleruagassanik erseqqinnerusunik kiisalu nakkutilliinnermut piumasaqaatit pillugit maleruagassanik erseqqinnerusunik Naalakkersuisut aalajangersaasinnaapput.

Isumaginninnikkut misissuineq

§ 45. Kommunalbestyrelse isumaginninnikkut misissuineramik suliaqassaaq meeraq immikkut ittunik ikiorserneqartariaqartutut isumaqarfigineqarpat, meeqqap atugai pillugit. Isumaginninnikkut misissuineq sapinngisamik meeqqap angajoqqaavi isumaginnittulluunniit allat meerarlu suleqatigalugit ingerlanneqassaaq. Pissutsit aallaavigalugit misissuineq sapinngisamik qajassuussisumik ingerlanneqassaaq, siunertarineqartumillu annertunerussanani.

Imm. 2. Kommunalbestyrelsip isumaginninnikkut misissuineramik suliaqarnermut atatillugu tulluuttut

nalilersussavai meeqqap atugaani pissutsit ataatsit arlallilluunniit allattorneqartuni tulliusuniittut pisariaqartissimangippassuk:

- 1) Meeqqap pissusilersornera, peroriartornera ineriartorneralu.
- 2) Meeqqap ilaqutariinni atugarisai, tassunga ilanngullugit ilaqutariit attaveqarfiillu katitigaaneri.
- 3) Meeqqap ulluunerani paaqqinnittarfimmut atuarnernulluunniit tunngasut.
- 4) Meeqqap peqqissutsimigut atugai.
- 5) Meeqqap sunngiffimmi atugarisai ikinnguteqarneralu.
- 6) Pissutsit attuumassuteqartut allat.

Imm. 3. Isumaginninnikkut misissuineq iliuusissanik pilersaarummik allaganngorlugit tunngavilersukkamik kinguneqassaaq, tak. § 46, tassani allassimassapput ikiorsiineq qanoq ittoq aallartinneqassanersoq. § 28 naapertorlugu nalilerneqarpat meeraq angerlarsimaffiup avataanut inissinneqartariaqartoq Suliassaqarfiit akimorlugit suleqatigiissitap suliap kommunalbestyrelsimi aalajangiiffigineqannginnerani pissutsit immikkut ittut atuutinngippata naliliineq allaganngorlugu nalunaarutigissavaa.

Imm. 4. Ikiuigallarnissamik aallartitsisoqarpat, isumaginninnikkut misissuinerup naammassineqarneranut atatillugu kommunalbestyrelsip ikiuigallarnek ingerlateqqinneqassanersoq unitsinneqassanersorluunniit pillugu isummissaaq. Tamatumunnga atatillugu meeqqap angajoqqaatullu oqartussaassusillip ikiuinermut qanoq isummersimanagerat eqqarsaatigineqassaaq.

Imm. 5. Inatsit alla malillugu meeraq ikiorserneqarsimappat, soorlu innarluutilinnut ikiorsiineq pillugu inatsit malillugu, tamakkununnga tunngasut kommunalbestyrelsip isumaginninnikkut misissuinerup ilanngutissavai, isumaginninnikkullu misissuinerup ilaatut meeqqap ikiorserneqarnissamik pisariaqartitsineranik tamakkiisumik nalilersuisoqassaaq, soorlu meeqqap innarluuteqarneranik tunngaveqartumik ikiorserneqartariaqarneq. Inatsisartut inatsisaat una aallaavigalugu inatsit alla malillugu ikiorsiisinnaaneq taamaalilluni meeqqap ikiorserneqarnissamik pisinnaatitaaffiinik killiliinngilaq.

Imm. 6. Kommunalbestyrelse isumaginninnikkut misissuineq tunngavigalugu ikiorsiinissamik aallartitsisoqarnissanut tunngavissaqarnersoq aalajangiissaaq.

Imm. 7. Isumaginninnikkut misissuineq pillugu maleruagassanik erseqqinnerusunik Naalakkersuisut aalajangersaassapput, tassunga ilanngullugit misissuinerup ingerlanneqarnera, ilusaa imarisaalu pillugit kiisalu isumaginninnikkut misissuinerup sularineranut naammassineqarnissanullu piffissaliuussinermik piumasaqarneq.

Iliuusissatut pilersaarutit

- § 46.** Kommunalbestyrelsi meeqqamut iliuusissanut pilersaarummik allaganngorlugu suliaqassaaq:
- 1) isumaginninnikkut misissuinerup atatillugu, tak. § 45,
 - 2) ikiorsiinissamik suliniuteqarnernik aallartitsisoqarnissanik aalajangiisoqartinnagu, tak. §§ 21 aamma 25, aamma inissiiinissaq pillugu, tak. §§ 27 imaluunniit 28,
 - 3) angajoqqaanngortussanut ikiorsiinissamik suliniuteqarnernik aallartitsisoqarnissanik aalajangiisoqartinnagu, tak. aamma § 26,
 - 4) ikiorsiinerit unitsinneqarnissanik aalajangiisoqartinnagu, tak. §§ 21 aamma 25, kiisalu suliniuteqareernermit malitseqartitsineq, tak. § 40, aamma

5) suliniuteqareermermi malitseqartitsinissamik aallartitsisoqarnissaa pillugu aalajangiisoqartinnagu, tak. § 42.

Imm. 2. Iliuusissanut pilersaarut;

1) inummut ataatsimut tunngassaaq ikiorsiinissamullu suliniuteqarnermut siunertaasoq allassimassalluni.

2) Isumaginninnikkut sullissinermi misissuinerit inernerannik iliuusissanut pilersaarut aallaaveqassaaq, tak. § 45.

3) Isumaginninnikkut sullissinermi misissuineri ajornartorsiutinut paasineqartunut tunngatillugu meeqqap ingerlalluarnernut ineriartorneranullu tunngasunik iliuusissanut pilersaarut ersarissunik anguniagalersugaassaaq.

4) Iliuseqarnerup qanoq sivisutiginnisaanik naatsorsuutiginnineq, pissutsit meeqqamut tunngasut immikkut ittut, tassunga ilanngullugit katsorsaaneq, ilinniartitaaneq il. il., kiisalu suliniuteqarnerup ataavartumik kommunalbestyrelsimit qanoq nalilersuiffiqeqartarnera aamma iliuusissanut pilersaarut qaqugu kingullermik nalilersuivigineqassanersoq.

Imm. 3. Inatsit alla malillugu meeraq ikiorserneqarsimappat, soorlu inunnut innarluutilinnut ikiorsiineq pillugu inatsit malillugu, tamakkununga tunngasut kommunalbestyrelsip iliuusissanut pilersaarummut ilanngutissavai.

Imm. 4. §§ 27 imaluunniit 28 malillugit angerlarsimaffiup avataanut inissiisoqarsimappat, iliuusissanut pilersaarummi inissiinermit siunertaasoq inissiinermilu anguneqartussatut naatsorsuutigineqartut allassimassapput.

Iliuusissamik pilersaarutip imarissavai:

1) Angerlarsimaffiup avataanut inissiinermi aamma piffissami meeqqap angerlarsimaffiup avataaniinnerani piffissamilu meeqqap angerlareernerata kingorna, meeqqap angerlarsimaffiani isumassuinikkut avatangiisit nukittorsarnissaannut ikiueriaatsit suut immikkut kommunalbestyrelsimit pilersinneqartussatut naatsorsuutigineqarnerisut

2) meeqqap angajoqqaaminut isumassuisuminullu qanigisaminut aalajangersimasumik inuttut attaveqarnissaa imaluunniit atassuteqarnissaa qanoq ililluni qulakkeerneqassanersoq allaaserineqassaaq, tamanna pissaaq meeqqamut ajoqutaassanngitsutut nalilerneqarpat.

Imm. 5. Angerlarsimaffiup avataanut inissiinermi inissiiffiusup iliuusissanut pilersaarummik tunineqarnissaa kommunalbestyrelsip isumagissavaa.

Imm. 6. Iliuusissanut pilersaarut angajoqqaatut oqartussaassusillip allalluunniit isumaginnittuusut meeqqallu oqaloqatiginerisigut suleqatiginerisigullu sapinngisamik suliarineqassaaq.

Imm. 7. Meeraq iliuusissanut pilersaarummi pineqartoq, angajoqqaatut oqartussaassusilik allalluunniit isumaginnittuusut iliuusissanut pilersaarummik ilisimatinneqassapput.

Imm. 8. Naalackersuisut iliuusissanut pilersaarutit qanoq isikkoqarnissaat imaqarnissaallu pillugit ersarinnerusunik malittarisassiussapput, kiisalu pilersaarutip inissiiviusumut ingerlateqqinneqarnissaa pillugit.

§ 47. Kommunalborgstyrelsip iliuusissanut pilersaarutip minnerpaamik ukiumut ataasiarluni iluarsineqartarnissaa qulakkiissavaa.

Imm. 2. Kommunalborgstyrelsip piaarnerpaamik aammalu imm. 1-imi aalajangersagaq apeqqutaatinnagu, iliuusissamut pilersaarummut attuumassuteqartunik meeqqap atugaani

allanngortoqarpat iliuusissanut pilersaarummik iluarsissuteqassaaq.

Katsorsaanissanut pilersaarutit

§ 48. Ulloq unnuarlu paaqqinniffiit, meeqqamut inissinneqartumut iliuusissanut pilersaarut aallaavigalugu, minnerpaamik ukiumut ataasiarlutik katsorsaanissamik pilersaarusiortassapput. Katsorsaanissamik pilersaarutip, inissiinermut iliuusissanut pilersaarummi siunertaasut anguniagaasullu aallaavigalugit katsorsaanissamut pilersaarutip piumasaqaataasa angunissaannik qulakkeerinnittunik perorsaanikkut katsorsaanikkullu suliaqarnissat allaaserissavai.

Imm. 2. Meeqqanut ulloq unnuarlu paaqqinniffinnut inissinneqarsimasunut iliuusissanut pilersaarutit qanoq isikkoqarnissat qanorlu imaqarnissat pillugit Naalakkersuisut ersarinnerusunik malittarisassiussapput.

Killiffiit pillugit nalunaarusiat

§ 49. Ulloq unnuarlu paaqqinniffiit kommunalbestyrelsip inummut sammititamik § 8, imm. 2 malillugu nakkutilliineranut atugassanik, meeqqap ulloq unnuarlu paaqqinniffimmi inissisimanerata nalaani ineriartorneranik kommunalbestyrelse ilisimatittassavaat. Meeqqap peqqissutsimigut inooqataanermigulluunniit atugaani allanngortoqarniariarpat imaluunniit annertuunik allanngortoqarnissaanik ilimanartoqarpat ulloq unnuarlu paaqqinniffiup kommunalbestyrelse ilisimatissavaa.

Imm. 2. Ulloq unnuarlu paaqqinniffik killiffik pillugu nalunaarusiussaaq, taannalu ulloq unnuarlu paaqqinniffimmut inissiinerup kingorna kingusinnerpaamik qaammatit pingasut qaangiunnerini kommunalbestyrelsimut nassiutissallugu, tamatumalu kingorna ukiumut marloriarluni nassiussisassalluni. Killiffik pillugu nalunaarusiaq meeqqap iliuusissanut pilersaarutaanut katsorsarneqarnissaanullu pilersaarutaanut naleqqiullugu meeqqap ingerlalluarnera ineriartorneralu pillugit paasissutissanik imaqassaaq.

Imm. 3. Meeqqanut ulloq unnuarlu paaqqinniffinnut inissinneqarsimasunut killiffiit pillugit nalunaarusiat qanoq isikkoqarnissat qanorlu imaqarnissat pillugit Naalakkersuisut ersarinnerusunik malittarisassiussapput.

Akuersineq

§ 50. Kommunalbestyrelsi angajoqqaanngortussanit imaluunniit angajoqqaatut oqartussaassusilimmit meeqqamiillu, taanna 15-inik ukioqalersimappat, ikiorsiinissamik suliniuteqarnissanik, tak. § 21, immikkut ittunik ikiorsiinissanik, tak. § 25, imaluunniit ikiorsiinissanik suliniuteqarnernik sukannernerusunik, tak. § 27, taamaattoq tak. imm. 2, aalajangiisoqartinnagu, allaganngorlugu akuersissummik pissarsiniassaaq. Suliniuteqareernermi malitseqartitsinermik, tak. § 42, aalajangiisoqartinnagu, kommunalbestyrelsi meeqqamit imaluunniit inuusuttumit allaganngorlugu akuersissummik pissarsiniassaaq.

Imm. 2. Imm. 1-imi oqaaseqatigiit siullianni akuersissummik piumasaqarneq saneqqunneqarsinnaavoq, ikiorsiinissamik suliniuteqarnermik aallartitsinissaaq meeqqap

peqqissusaanut, ineriartorneranut peroriartorneranullu annertuumik pingaarutilittut isigineqarpat kiisalu ikiorsiinissamik suliniuteqarnek akuersissummik pissarsinngikkaluarluni anguneqarsinnaasutut isigineqarpat.

Imm. 3. Aalajangikkat, tak. § 6, angajoqqaatut oqartussaassusilimmik imaluunniit meeqqamit akuersissummik pisariaqartitsinngillat.

Siusissukkut pinaveersaartitsiniarluniluunniit sulinermi paasissutissanik paarlaasseqatigiinneq

§ 51. Atuarfik, atuareermermi ornittagaq, napparsimasunik paarsisut, peqqissaasut, nakorsat, kigutit nakorsaat kigutigissaasullu kommunip peqqissaaviani atorfeqartut, ulluunerani neqeroorutit, sunngiffimmi ornittagaq oqartussaasullu meeqqanik atugarliortunik sullissinerup iluani suliassanik suliaqartartuusut meeqqap inuttut ilaquuttaminilu atugarisai, inummut namminermtunngalluinnartut pillugit paasissutissat akunnerminni paasissutissiissutigisinnaavaat, paasissutisseeqatigiinneq meeqqat atugarliortut pillugit siusissukkut pinaveersaartitsiniarluniluunniit suleqatigiinnermut ata tillugu pisariaqartuusorineqarpat.

Imm. 2. Meeraq aalajangersimasoq pillugu suliassami paasissutissanik paarlaasseqatigiinneq, tak. kapitalit 7-imiit 9-mut aamma § 42, ataatsimiinnermi ataasiartumik pisinnaavoq. Immikkut ittumik pisoqartillugu oqartussaasut suliffeqarfiillu imm. 1-imi taaneqartut akornanni paasissutissanik paarlaasseqatigiinneq malitseqartitsilluni ataatsimiinnermi pisinnaavoq.

Imm. 3. Suliffeqarfiit imminnut pigisut namminersortunilluunniit pigineqartut, katsorsaaviit namminersortut atuarfiilluunniit namminersortut pisortat imm. 1-imi taaneqartut suliassaataannik suliaqartuusut, akunnerminni aammalu pisortanut suliffeqarfinnullu imm. 1-imi taaneqartunut paasissutissanik imm. 1-imi taaneqartutuulli annertutigisumik paarlaasseqatigiissinnaapput.

Imm. 4. Oqartussaasut suliffeqarfiillu imm. 1-imiit 3-mut malillugit paasissutissanik ingerlatitseqqisinnaasut taamaaliornissaminnut pisussaaffeqanngillat.

Politiinut unnerluussisussaataitaasunullu paasissutissanik ingerlatitseqqiinerit

§ 52. Kommunini oqartussaasut meeqqanik inuusuttunillu atugarliortunik sullissinerup iluani suliassanik isumaginnittuusut politiinut unnerluussisussaataitaasunullu meeqqap inuttut ilaquuttaminilu atugarisai, inummut namminermtunngalluinnartut, pillugit paasissutissanik ingerlatitseqqisinnaapput, ingerlatitseqqiinneq meeqqat naapertuilluannngitsuliorfigineqarnissaannik pinaveersaartitsinermut atatillugu pisariaqarsorineqarpat.

Kapitali 13

Peqatigiiffiit

§ 53. Malitassat ersarinnerusumik aalajangersakkat tunngavigalugit, peqatigiiffiit meeqqanik suliaqarnerup iluani sammisaqartitsinernik aalajangersimasunik suliaqarnissani inunnik isumaginnittoqarfimmik suleqateqarnissaat Naalakkersuisut akuerisinnaavaat.

Kapitali 14

Meeqqat Pillugit Paasisimasalittut Qitiusumik Ataatsimiititaliaq

§ 54. Meeqqat Pillugit Paasisimasalittut Qitiusumik Ataatsimiititaliaq arfinilinnik ilaasorta qarpoq, tamarmik meeqqat pisariaqartitaannik ineriartornerinillu immikkut ittumik ilisimasaqartussat.

Ataatsimiititaliaq imatut katitigaassaaq:

- 1) 1 inatsisileritooq,
- 2) 1 tarnip pissusiinik ilisimasalik,
- 3) 1 inunnik isumaginninnermi siunnersorti,
- 4) 1 isumaginninnermi perorsaasoq,
- 5) 1 ilinniartitsisoq, aamma
- 6) 1 meeqqerisoq.

Imm. 2. Naalackersuisut ataatsimiitsitaliamik ukiuni sisamani atuuttussamik pilersitsissapput.

Imm. 3. Ataatsimiititaliap suliassarissavaa meeqqap inissiffiusumiit anisinneqarnissaa pillugu suliani oqaaseqaateqarnissaaq, tak. § 41, imm. 2-mi oqaaseqatigiit aappaat.

Imm. 4. Naalackersuisut ataatsimiititaliaq sinnerlugu allattoqarfimmik isumaginnissapput.

Imm. 5. Naalackersuisut ataatsimiititaliap sulianik ingerlatitsisarnissaanut, suleriaasissaanut, kiisalu ataatsimiititaliap ilisimasalinnik oqaaseqaatinik pissarsiniartariaqarsinnaaneranut erseqqinnerusunik malitarisassanik aalajangersaasinnaapput.

§ 55. Allattoqarfik Meeqqat Pillugit Paasisimasalittut Qitiusumik Ataatsimiitsitaliamut oqaaseqarfigisassangorlugu tunniussippat, tak. § 41, imm. 2, 2-mi oqaaseqatigiit aappaat, meeqqap ulloq unnuarlu paaqqinnittarfimmiit angerlartinneqarnissaa pillugu aalajangiisoqartinnagu ataatsimiitsitaliap oqaaseqaataanik tigusaqarnissani kommunalbestyrelsip utaqqigallassavaa.

Imm. 2. Kommunalbestyrelse inissiiffiusullu ataatsimiititaliap qinnuiginninneratigut qulakkiissavaat suliami paasissutissat pisariaqartinneqartut ataatsimiititaliamit tiguneqarnissaat, paasissutissat imarissavaat:

- 1) Meeraq pillugu suliami allagaatit.
- 2) Kommunalbestyrelsip angerlartitsinissaaq pillugu inassuteqaataa.
- 3) Siusinnerusukkut iliuusissanut pilersaarutit, kiisalu katsorsaanissamik pilersaarutit killiffiusumullu nalunaarusiat.
- 4) Angerlartitsineq pillugu iliuusissanut pilersaarut nutaaq.
- 5) Suliassaqarfiit akimorlugit suleqatigiissitap oqaaseqaataa.
- 6) Ulluunerani paaqqinnittarfimmiit, atuarfimmiit assigisaanniilluunniit oqaaseqaataasinnaasut.
- 7) Tarnip pissusiinik ilisimasalimmik, nakorsamik assigisaanniilluunniit oqaaseqaataasinnaasut.
- 8) Meeqqap angerlartinneqannginnissaanut inissiiffiusup tunngavilersuutaa.
- 9) Angajoqqaatut oqartussaassuseqartumi meeqqap angerlarfissaatut kissaatigineqartumi atugassarititaasut pillugit allaaserinninneq.
- 10) Akuersissutit imaluunniit akuersissutip utertinneqarnera.
- 11) Attuumassuteqartut allat tamaasa meeraq pillugu paasissutissat ataatsimiitsitaliap pissarsiarerusutai.

Imm. 3. Suliaq tamakkiisumik ilisimatitsissutigineqarpat atortussallu tamarmik kalaallisut qallunaatullu allassimalerpata Meeqqat Pillugit Paasisimasalittut Qitiusumik Ataatsimiitsitaliap

suliamut tunngatillugu oqaaseqaataasa tunniunneqarnissaannut sapaatit akunneri sisamat piffissarititaapput. Tunniussinissamat piffissarititaq ullut arfineq marluk sinnerlugit qaangerneqarpat Meeqqat Pillugit Paasisimasalittut Qitiusumik Ataatsimiitsitaliap allattoqarfiata suliap suliarineqarnissaanut piffissaritinneqartoq nutaaq pillugu ilisimatitsissut kommunalbestyrelsimut inissiiffiusumullu nassiutissavaa.

Kapitali 15

Akiliutit naleqqussarneqartarnerat aningaasalersornerallu

Aningaasalersuineq

§ 56. Inatsisartut inatsisaat una malillugu meeqqanik ikiorsiinermut aningaasartuutit kommuninit akilerneqartassapput.

Imm. 2. Inatsisartut inatsisaat una malillugu inuusuttunut suliniuteqareernermi malitseqartitsilluni ikiorsiinermut aningaasartuutit kommuninit akilerneqartassapput.

Imm. 3. Meeqqat Pillugit Paasisimasalittut Qitiusumik Ataatsimiitsitaliamut aningaasartuutit Naalakkersuisunit akilerneqartassapput.

Imm. 4. Ulloq unnuarlu paaqqinniffinnik ingerlatsineq kommunip akigititaanik akiliinerit aqqutigalugit aningaasalersorneqassaaq, tak. § 57.

Imm. 5. Inatsisartut inatsisaat una malillugu Naalakkersuisut, kommunit paaqqinniffiillu imminnut pigisut namminneq pigisassaminnik pilersitsinerminnut atasumik aningaasartuutit tamarmik immikkut akilertassavaat.

Imm. 6. Naalakkersuisut nunat allat ingerlatsinikkut oqartussaasuinik isumaqatigiissuteqarnermikkut Inatsisartut inatsisaat una malillugu ikiorsiinernik aallartitsinernut aningaasartuutininut atatillugu iliuseqartussaannermit akiliutinillu utertitsinissanut malittarisassanik aalaja-ngersaasinnaapput, meeraq inuusuttorluunniit suliniuteqareernermi malitseqartitsilluni suliniuteqarfigineqartoq Kalaallit Nunaanni oqartussat ikiuinissamik suliniuteqarnerisigut Kalaallit Nunaata avataanut inissinneqarsimagaangat.

§ 57. Meeqqanut ulloq unnuarlu paaqqinniffinnut inissinneqarsimasunut, tak. § 3, imm. 2, nr. 2 nr. 3-lu, kommunip akigititanut akiliutissaa naatsorsorneqassaaq ullut unnuarlu inissiiffiusut ataasiakkaarlugit.

Imm. 2. Ulloq unnuarlu paaqqinniffiit meeqqanut inuusuttunullu ulloq unnuarlu paaqqin-niffinnut inissinneqartunut suliniuteqareernermilu malitseqartitsilluni suliniuteqarfigineqartunut kaasarfimmiussanik atisassarsiutissanillu tunniussisussaapput.

Imm. 3. Kaasarfimmiunut atisassarsiutissanullu aningaasat annertussusaat kommunit akigititanut akiliutaannut ilanngunneqarput, tak. imm. 1.

Imm. 4. Imm. 1-imi taaneqartoq akigititanik akiliineq pillugu maleruagassanik erseqqinnerusunik Naalakkersuisut aalajangersaasinnaapput, tassunga ilanngullugit aningaasartuutit suut kommunip akiliutaanut ilaassanersut.

Imm. 5. Naalakkersuisut ulloq unnuarlu paaqqinniffiit kommunimit akigititanik akiliiffigineqartartut tamaasa aningaasaqarnerannik nakkutiginnissaat pisinnaatitaaffigaat.

Imm. 6. Imm. 2 malillugu kaasarfimmiut atisassarsiutissallu, tassunga ilanngullugit tunniunneri,

aningaasat annertussusissaat aammalu ulloq unnuarlu angerlarsimaffimmi perorsaanermik suliaqarnerup ilaatut kaasarfimmiussanik malittarisassiornissamik Naalakkersuisut aalajangersaasinnaapput.

§ 58. Naalakkersuisut maleruagassanik sinaakktissaat akilerneqartarnissaallu pillugit malittarisassanik erseqqinnerusunik aalajangersaasinnaapput, tak. § 30, imm. 2, nr 4.

Akiliutinik naleqqussaaneq

§ 59. Inatsisartut inatsisaat una naapertorlugu akit aalajangersaavigineqartut ukiumut ataasiarlutik naleqqussarneqartassapput. Akinik aalajangersaaneq ukiumut ataasiarluni januaarip aallaqqaataani Naalakkersuisunit tamanut saqqummiunneqartassapput.

Kapitali 16

Naammagittaalliuuteqarsinnaaneq

§ 60. Kommunalbestyrelsip Inatsisartut inatsisaat una malillugu aalajangigai, Isumaginnermi Naammagittaalliortarfimmut naammagittaalliuutigineqarsinnaapput Isumaginnittoqarfiup aqunneqarnera aqqissuunneqarneralu pillugit Inatsisartut peqqussutaanni aalajangersakkat malillugit.

Imm. 2. Inatsisartut inatsisaat una malillugu aalajangersakkat naapertorlugit aalajangiinernut, meeqqat suliani imminnut tunngasuni, tak. imm. 1, naammagittaalliorsinnaatitaapput.

Imm. 3. Meeqqap naammagittaalliorsinnaatitaanera pillugu maleruagassanik erseqqinnerusunik Naalakkersuisut aalajangersaasinnaapput.

Kapitali 17

Pineqaatissiisarnernut aalajangersakkat

§ 61. Naalakkersuisut kommunalbestyrelse pingitsaaliissutinik akiligassissinnaavaat, tassunga ilaalluni ullormut akiliisitsineq, uppersineqarsinnaappat Inatsisartut inatsisaanni uani aalajangersakkat naapertorlugit kommunalbestyrelse oqartussaasutut pisussaaffimminik eqqortitsinissamik annertuumik sumiginnaasimappat sumiginnaasaqattaarsimappalluunniit imaluunniit mianersuaalliorsimappat.

Imm. 2. Inatsisartut inatsisaat una tunngavigalugu pingitsaaliissummik akiliisinneqarnermi akiliutit Nunatta Karsianut nakkartinneqassapput.

Kapitali 18

Atortuulersitsineq ikaarsaarnermilu aalajangersakkat

§ 62. Inatsisartut inatsisaat una 1. Juli 2017-imi atuutilerpoq.

Imm. 2. Peqatigisaanik Meeqqanik inuusuttunillu ikiorsiisarneq pillugu Inatsisartut peqqussutaat nr. 1, 15. april 2003-meersoq atorunnaarpoq.

Imm. 3. Allaffissornikkut aalajangersakkat Inatsisartut peqqussutaanni imm. 2-mi taaneqartut tunngavigalugit aalajangersakkat aalajangersarneqarsimasut, Inatsisartut inatsisaat una allaluunniit

tunnngavigalugit malittarisassianik taarserneqarnissamik atorunnaarsinneqarnissamilluunniit tungaanut
atuutissapput.

Namminersorlutik Oqartussat, ulloq 26. juni 2017

Kim Kielsen